

# Troll Najib jadi fenomena alam siber

Um - 22/1/2019  
m/s: 9

Oleh **BADRUL HAFIZAN MAT ISA**

pengarang@utusan.com.my

■ **KUALA LUMPUR 21 JAN.**

“**B**ARU seminit *post* dah dapat 2,000 *like*, korang semua tidur dalam *page* ni ke?” Itu merupakan sebahagian daripada komen mencuit hati warganet dalam akaun Facebook milik bekas Perdana Menteri, Datuk Seri Najib Tun Razak.

Najib kini umpama seorang selebriti, setiap hantaran dimuat naik dalam media sosial miliknya terutama di Facebook mendapat sambutan hangat, puluhan ribu ‘tanda suka’ serta ribuan komen dan perkongsian diperoleh.

Slogan dipopularkan Najib ‘Malu Apa Bosku’ tiba-tiba juga menjadi ikutan, disebut-disebut sehingga ke pentas *Maharaja Lawak Mega 2018*.

Malah telah ada pihak yang mula mencetak slogan itu di baju-T di samping gambar Najib beraksi dengan motosikal Yamaha Y15ZR atau disebut anak muda Y-Suku.

Tiada siapa sangka, jika sebelum Pilihan Raya Umum Ke-14 (PRU-14) dahulu, akaun Facebook Najib dihujani komen memaki hamun beliau dan Barisan Nasional (BN), kini tidak lagi, berubah sepenuhnya, 360 darjah.

Najib dianggap wira, malah ada yang memberinya gelaran sebagai ‘raja troll’ ekoran serangan *troll* (sindiran sinis) bertalu-talu olehnya terhadap Pakatan Harapan (PH) yang sentiasa mengena sasaran dan menarik perhatian warganet.

Sindiran Najib bukanlah kosong tetapi penuh fakta sehinggakan tidak dapat disangkal oleh PH. Adakalanya kerajaan dilihat



**GAMBAR** Najib sedang bersenam di gimnasium yang dimuat naik dalam akaun Facebook miliknya mendapat reaksi menggalakkan warganet.

terpaksa akur dengan mengubah beberapa keputusan penting, semuanya dipercayai gara-gara tekanan ekoran *troll* Najib dalam Facebook.

Pemimpin DAP, Lim Kit Siang serta menteri-menteri PH yang lain seperti Lim Guan Eng, Dr. Maszlee Malek dan yang terbaharu, Menteri Wilayah Persekutuan, Khalid Abdul Samad semuanya pernah menerima cuitan *troll* daripada Najib.

Antara yang cuba melakukan sindiran balas kepada Ahli Parlimen Pekan itu ialah Khalid apabila beliau membuat hantaran ke akaun Facebook miliknya dan juga Timbalan Menteri Sumber Manusia, Datuk Mahfuz Omar.

Namun maklum balas diterima

kedua-dua pemimpin itu berlainan sehingga warganet menyatakan perlu cuba lagi untuk menjawab sindiran yang dimuat naik oleh Najib.

Tidak kurang dengan itu, beberapa akaun Facebook *troll* yang menjadi ikutan dalam kalangan warganet sebelum ini seperti Tentera Troll Kebangsaan Malaysia (TTKM), Amran Fans, Sultan Melaka juga dilihat terkesan dengan populariti Najib, sukar nak cari makan.

“Serius, tahap ilmu *troll* Datuk Seri Najib ini dah buatkan Tentera Troll Kebangsaan Malaysia macam budak tadika,” ujar seorang warganet, Nabeel Naqie.

Menurut seorang penceramah, Mohd. Fairuz Abu menerusi akaun Facebook miliknya, Akhi Fairuz Al-Jengkawi, Najib kini dilihat sedang membina kredibiliti dengan persepsi menerusi sindiran yang dimuat naik di sebalik berdepan puluhan pertuduhan mahkamah.

“Beliau konsisten, warganet pula ibarat memasang khemah di *page*, Instagram dan Twitter, teruja menantikan *update* terkini. Dari pemerhatian aku, salah satu faktor BN bungkus PRU yang lepas berpunca dari *troll* seperti inilah.

“Ini cara anak muda ‘berpolitik’, mereka tak mahu berat-berat. Selagi isu 1MDB tak selesai, semakin berpotensi untuk Najib mempengaruhi anak muda untuk percaya yang beliau tidak terpalit dalam isu 1MDB,” katanya